

ԳԼՈՒԽ Ե.

1 Յաղագս որդւոց քահանայապետին Վրթանայ, որոց անուանք էին երիցուն Գրիգորիս, եւ երկրորդին Յուսիկ:

2 Այս Վրթանես եւ Արիստակես որդիք էին մեծի քահանայապետին Գրիգորի, եւ էր Արիստակես կուսան՝ սուրբ ի մանկութենէ. զի թեպէտ եւ կրտսեր որդի էր, կանխաւ եհաս յաթոռ հայրենի եպիսկոպոսութեան: 3 Իսկ Վրթանես էր ամուսնացեալ եւ անորդի. եւ բազում ժամանակս խնդրէր նա յԱստուծոյ. զի մի՛ զրկեսցի նա յաւրհանութենէն զաւակի, այլ ի պտղոյ նորա կացցէ առաջի նորա ի պաշտաւն Տեառն: 4 Եւ ի ծերութեան նորա լուաւ Տէր աղաւթից նորա. յղացաւ ամուսին նորա, եւ ծնաւ երկուս որդիս երկուորեակս, եւ կոչեաց զանուն երիցուն յանուն հաւր իւրոյ Գրիգորիս, եւ երկրորդին Յուսիկ, որք սնան զառաջեաւ թագաւորին Յայոց, եւ ուսման գրոց փոյթ ի վերայ կալան ուսուցանել զնոսա: 5 Ապա երեց որդին Գրիգորիս եհաս յեպիսկոպոսութիւն կողմանց Աղուանից եւ Վրաց, վասն հոգեկիր առաքինի արգասեացն, բարեհասակ, եւ զգիտութիւն Աստուծոյ յանձին կրելով: 6 Ոչ ամուսնացաւ նա, այլ ի հնգետասանամենից եհաս յաստիճան եպիսկոպոսութեան աշխարհին Վրաց եւ Աղուանից, այս ինքն սահմանացն Մազքթաց: 7 Երթեալ նորոգեաց անդ զեկեղեցիսն լուսաւոր կարգաւք, առաջնոյն Գրիգորի՛ հաւրն գործոցն նմանեալ:

8 Իսկ զՅուսիկ սնուցանէր Տիրան որդի թագաւորին խոսրովու. եւ ետ արքայորդին Տիրան գղուստր իւր կնութիւն Յուսկանն որդւոյ Վրթանիսի: 9 Եւ մինչ դեռ մանուկն էր, յետ միանգամ յառաջնում զիշերին մտանելոյ՝ յղացաւ կինն: 10 Եւ իսկ եւ իսկ ետես ի տեսլեանն՝ զի երկու էին մանկունքն, եւ ոչ հաճոյ ի պաշտաւն Տեառն Աստուծոյ. եւ զղջացաւ զամուսնանալն: 11 Լայր եւ աղաչէր զԱստուած, եւ ապաշխարէր<sup>1</sup> մեծաւ տառապանաւք: 12 Եւ յամուսնանալն բռնադատեցաւ ի թագաւորէն իբրեւ զմանուկ. սակայն եւ այն ըստ Աստուծոյ շնորհացն գործէր, զի որք առ յապայն յառնելոց էին ի նմանէ հովիւքն զլիսաւորք, որք յաւգուտ աշխարհին եւ ի շահ մշակութեան եկեղեցեաց յաւետարանական<sup>2</sup> հրամանացն սպասաւորել: 13 Այլ սակայն նա ըստ այն մի գիշերն այլ ոչ եմուտ առ կինն իւր. եւ ծնաւ կինն երկաւորիս<sup>3</sup>, որպէս եւ ետես ի տեսլեանն յառաջագոյն. եւ կոչեցին զանուն առաջնոյն Պապ, եւ զերկրորդին Աթանագինես:

14 Եւ յետ միոյ գիշերոյ ի կինն մերձենալոյ այլ ոչ եւս մերձեցաւ ի նա, վասն առաքինութեան մանկութեան. իբրեւ ոչ եթէ զամուսնութիւնն ինչ աղ-

1 Միւս օրինակն՝ եւ ապաշաւէր

2 Միւս օրինակն՝ անետարանական

3 Միւս օրինակն՝ երկու որդիս